

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-39-Z/24

Kakanj, 29.03.2024. godine

Z A P I S N I K

**sa 39. redovne sjednice Općinskog vijeća održane 29.03.2024. godine (petak)
u sali Općinskog vijeća sa početkom u 09:00 sati
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 39. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Mediha Mamela, Džemal Bećirhodžić, Safet Šahman, Nerma Aliefendić, Omer Musić, Namir Talić, Adis Mrkonjić, Amar Selimović, Izudin Hrusto (naknadno pristupio), Elvir Delibašić, Kenan Kozlo i Alen Josipović (naknadno pristupio) **(SDA)**

Vinka Aletović, Miroslav Spasojević, Edin Šljivo i Ahmed Begić **(SDP BiH)**

Sabit Čehajić **(S BiH)**

Dževdet Huskić, Marcela Ravlija i Branko Češljčić **(NS)**

Enver Merdić i Mugdin Gorak **(SBB BiH)**

Armin Bašić i Adnan Čobo **(DF)**

Slaven Katičić **(HDZ BiH)**

Mujo Fafulić - **(nacionalna manjina)**

Mirsad Tursum, Zerina Kovač i Fakir Ajdinović **(samostalni vijećnici)**

Odsutni vijećnici: Mejrema Purišević i **(SDA)**

Predsjedavajući je konstatovao da je na sjednici u momentu prijave prisutno 28 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Emir Zaimović, sekretar Općinskog vijeća – po ovlaštenju

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Zijad Neimarlija, direktor Zavoda za planiranje i izgradnju općine Kakanj

Alem Škulj, ispred Službe za imovinskopravne, geodetske poslove i katastar nekretnina

Mahir Sikira, šef Stručne službe za poslove Općinskog načelnika

Izviestioci, obrađivači, gosti

Vesna Ajanović, općinski pravobranilac

Ajla Čišija, predsjednica Komisije za dodjelu Petnaestoaprilskih priznanja

Nihad Tukić, predsjednik UO i Dženan Ajdinović, direktor JU „Kulturno-sportski centar“ Kakanj

Emina Šarić, član UO JU Centar za socijalni rad Kakanj

Haris Veispačić, direktor JP „Vodokom“ d.o.o. Kakanj

Predstavnici medija

NTV IC Kakanj

Radio Kakanj

Napomene o radu Kolegija Općinskog vijeća

U pripremi 39. redovne sjednice Općinskoga vijeća, Kolegij Općinskog vijeća je 20.03.2024. godine, održao sjednicu na kojoj je razmatrao:

a) Zahtjev JU „Gradska biblioteka“ Kakanj za ponovno razmatranje Programa rada i Finansijskog plana za 2024. godinu na sjednici Općinskog vijeća

Kolegij nije postigao konsenzus za uvrštavanje materijala u dnevni red sjednice Vijeća.

b) Informacija i poziv na saradnju po pitanju željezne konstrukcije Okna na ulazu u nekadašnji pogon „Stara jama“ RMU „Kakanj“ d.o.o. Kakanj

Kolegij je Informaciju i Poziv RMU „Kakanj“ primio k znanju obzirom da je materijal dostavljen i Općinskom načelniku, te se očekuje očitovanje istog.

c) Zahtjev RMU „Kakanj“ d.o.o. Kakanj za davanje saglasnosti na izmjenu dijela Ugovora o koncesiji

Kolegij je Zahtjev RMU „Kakanj“ d.o.o. Kakanj primio k znanju, te će o istom odlučivati nakon što prethodno bude provedena procedura kod Ministarstva za privredu ZDK.

d) Odgovor JP „Vodokom“ d.o.o. Kakanj na Zaključak Kolegija

Odgovor Vodokoma je primljen k znanju uz konstataciju da se na dnevnom redu sjednice Vijeća nalazi Informacija JP „Vodokom“ u vezi otvaranja rudnika Rupice-Vareš od strane Adriatic Metals.

e) Građanska inicijativa građana MZ Doboj za rješavanje urgentnih problema u vezi odvijanja saobraćaja na području MZ Doboj

Kolegij je utvrdio da Građanska inicijativa građana MZ Doboj ne ispunjava formalno-pravne uslove propisane Statutom Općine Kakanj za postupanje po istoj kao po Građanskoj inicijativi, te je istu prosljedio Općinskom načelniku, Službi za privredu, urbanizam i zaštitu okoline i Odsjeku za inspekcije da sagledaju mogućnost postupanja po predmetnom aktu u okviru svojih nadležnosti i ovlaštenja.

f) Zahtjev RMU „Kakanj“ d.o.o. Kakanj za sazivanje vanredne sjednice Općinskog vijeća

Kolegij je odlučio da Zahtjev RMU „Kakanj“ za sazivanje vanredne sjednice uvrsti kao tačku dnevnog reda redovne sjednice Općinskog vijeća.

Usvajanje zapisnika sa sa 37. vanredne i 38. redovne sjednice Općinskog vijeća

U diskusiji je učestvovao Dževdet Huskić.

Dževdet Huskić: je predložio da se zapisnik sa 38. redovne sjednice dopuni u dijelu pod tačkom 12. dnevnog reda „Razmatranje Informacije o rješavanju problematike gradske zelene pijace“, na način da se u isti unese broj i datum akta „Informacija o rješavanju problematike gradske zelene pijace“ po kojoj je Vijeće donijelo odgovarajuće zaključke.

Nakon diskusije Vijeće je jednoglasno sa 26 glasova ZA usvojilo zapisnike sa 37. vanredne i 38. redovne sjednice Općinskog vijeća, uz prihvatanje korekcije predložene od vijećnika Huskića.

Komentari na dostavljene odgovore na vijećnička pitanja

Nije bilo komentara na odgovore na vijećnička pitanja.

Komentari na dostavljena mišljenja na vijećničke inicijative

Marcela Ravlija: je kazala da je na podnesenu vijećničku inicijativu za ugradnju lifta u Domu zdravlja Kakanj dobila odgovor Ministarstva zdravstva ZDK, dok od Doma zdravlja nije dobila odgovor. U odgovoru Ministarstva se navodi da su prilikom pripreme Budžeta ZDK za 2024. godinu poslali dopise svim domovima zdravlja u kantonu da dostave prijedloge za prioritete potrebe u smislu nabavke opreme i izvođenja infrastrukturnih radova, ali se Dom zdravlja nije oglasio po tom dopisu. Podsjetila je da je u Budžetu ZDK za 2024. godinu planirano preko 5 miliona KM za zdravstvo na nižim nivoima vlasti. Pozvala je menadžment Doma zdravlja da se aktivira jer smatra da za ugradnju lifta nisu potrebna velika sredstva, pogotovo ako bi se ista obezbijedila od tri izvora (Općina Kakanj, nadležno Ministarstvo i vlastita sredstva Doma zdravlja).

Mirsad Tursum (odgovor): je podsjetio da je Dom zdravlja još prije 4 godine pokrenuo inicijativu za ugradnju lifta i aplicirao prema međunarodnim fondovima, ali su sredstva na kraju otišla u druge svrhe, kada je bilo izvjesno da će doći u Kakanj, što pokazuje da je menadžment Doma zdravlja jako zainteresovan za predmetnu problematiku. Dalje je naveo nekoliko razloga zašto se do sada nije realizovao taj projekat, te je rekao da niti jedan dom zdravlja sa jednim spratom nema ugrađen lift, da nema smisla ugradnja lifta ako se zna da je planirana rekonstrukcija Doma zdravlja i podizanje spratnosti postojećeg objekta, da Dom zdravlja nema vlastitih sredstava za infrastrukturne projekte, te je rekao da vijećnica Ravlija prilikom usvajanja Budžeta Općine nije predložila amandman kojim bi se planirala sredstva za infrastrukturne projekte u Domu zdravlja Kakanj. Podsjetio je još da je u prethodnoj godini Dom zdravlja potrošio preko 400 hiljada KM vlastitih prihoda na nabavku vozila i dodatne opreme, te je rekao da su se krajem prošle godine obraćali Ministarstvu za sufinansiranje nabavke te opreme i vozila, ali su dobili negativan odgovor i upućeni su na osnivača Općinu Kakanj. Na kraju je rekao da je Dom zdravlja spreman izdvojiti iz vlastitih izvora 50% sredstava za nabavku i ugradnju lifta, ukoliko se obezbijedi preostalih 50% sredstava.

Marcela Ravlija: je istakla da joj izneseno od vijećnika Tursuma nije bilo poznato obzirom da nije dobila odgovor Doma zdravlja na podnesenu inicijativu, te je ona pročitala ono što je navedeno u odgovoru Ministarstva. U vezi ulaganja amandmana na Budžet Općine je rekla da je Klub NS u prethodnim godinama uložila najviše amandmana, ali da isti nisu prihvaćeni od predlagača.

Vijećnička pitanja

Armin Bašić: je postavio vijećničko pitanje zašto se Općina Kakanj ne uključi u problematiku rada dežurne apoteke obzirom da trenutno ne postoji ni jedna apoteka koja radi 24h, dok istovremeno u Kakanju ima nekoliko kazina koji rade rade „non stop“?

Dževdet Huskić: je postavio dva vijećnička pitanja. Prvo je uputio Vodokomu i pitao da li je vrijeme da razmisle o naplaćivanju isporučene vode građanima po cijeni tehničke vode, a zbog činjenice da veliki broj korisnika Vodokoma kupuje ili sipa vodu na izvorima? S obzirom na izraženo nepovjerenje među građanima kad je u pitanju kvalitet vode koju Vodokom isporučuje, smatra da bi trebalo razmotriti mogućnost naplaćivanja isporučene vode građanima po cijeni tehničke vode. Drugo pitanje je uputio Grijanju i pitao da li razmatraju skraćivanje sezone grijanja na 6 mjeseci od sljedeće grejne sezone? Imajući u vidu relativno povoljne vremenske prilike posljednjih godina tokom sezone grijanja, te izvjesno poskupljenje električne energije koje će sljedeće sezone neminovno dovesti i do povećanja cijene grijanja, zanima ga da li se razmatra mogućnost skraćivanja sezone grijanja na 6 mjeseci, kao što je to bilo desetinama godina ranije.

Marcela Ravlija: je postavila vijećničko pitanje koliko je novca do sada ukupno izdvojeno za put Kakanj – Kondžilo (Brnjic)? Obzirom da put Kakanj – Kondžilo (Brnjic) još uvijek nije završen, a započet je 2019. godine, zanima je koliko novca je izdvojeno sa svih nivoa, koliko sredstava je utrošeno do sada, koliko sredstava je planirano za projekat, u kojoj fazi su radovi, odnosno kad je put trebao biti završen i zbog čega do sada nije završen?

Adnan Čobo: je postavio vijećničko pitanje da li svjetleća reklama/naziv škole na OŠ „Hamdija Kreševljaković“ Kakanj treba da blinka cijelo vrijeme (pali se i gasi), ili se radi o kvaru na instalaciji?

Predsjedavajući je konstatovao da su vijećnici: Safet Šahman, Adis Mrkonjić i Vinka Aletović postavili vijećničko pitanje bez korištenja govornice.

Safet Šahman: je postavio vijećničko pitanje zašto JU „Dom zdravlja sa stacionarom“ Kakanj nije izvršila prenos mjernog mjesta u Elektodistribuciji na svoju adresu, kako bi računi pristizali istoj, a ne na adresu MZ Krševac, te kada se planira pustiti u funkciju ambulanta Krševac?

Adis Mrkonjić: je postavio vijećničko pitanje kada je planirana ugradnja zaštitne mreže na kosinama ceste za Tršće, a iz razloga što su na predmetnoj cesti vrlo česta osipanja kamenja i zemlje na kolovoz što ugrožava odvijanje saobraćaja?

Vinka Aletović: je postavila vijećničko pitanje na koji način je uređen sistem zakupa parking prostora koji se nalaze u vlasništvu Općine Kakanj?

Vijećničke inicijative

Marcela Ravlija: je pokrenula dvije vijećničke inicijative. Prva se odnosi na izradu registra izvora pitke vode koji se nalaze na području općine Kakanj. Da bi zaštitili naša izvorišta potrebno je prije svega napraviti registar izvora pitke vode na koji način bi se napravio prvi korak ka izradi budućih elaborata zaštite izvorišta i donošenju odluka od strane nadležnih organa o zaštiti tih istih izvora. Druga inicijativa je za promjenu smjera kretanja vozila u ulici Šehida (iza STŠ „Kemal Kapetanović“ prema OŠ „Hamdija Kreševljaković“). Dio ulice Šehida koji ide od STŠ „Kemal Kapetanović“ prema OŠ „Hamdija Kreševljaković“ je jednosmjerna ulica do Sportske dvorane, pa tako svi koji iz gornjeg dijela grada automobilom trebaju doći do školskog parkinga ili parkinga iza Sportske dvorane, trebaju ići do kružnog toka na ulazu u grad i vratiti se do OŠ „Hamdija Kreševljaković“. Promjenom smjera navedenog dijela ulice bilo bi lakše doći do Sportske dvorane i do školskog parkinga, pogotovo kad se vozi novoizgrađenom cestom tj. ulicom Darivalaca krvi.

Dževdet Huskić: je pokrenuo dvije vijećničke inicijative. Prva inicijativa je da „Vodokom“ i „Grijanje“ planiraju i sprovedu anketu među korisnicima o zadovoljstvu pruženim uslugama ovih javnih preduzeća. Anketu je potrebno osmisliti na način da se dobiju što precizniji podaci o zadovoljstvu korisnika sa svim vrstama pruženih usluga. U tom smislu je predložio da preduzeća zajednički angažuju neke od nezavisnih agencija koje se bave ovim poslom (IPSOS ili slična agencija) i da rezultati istraživanja budu javno objavljeni na stranicama preduzeća. Druga inicijativa se odnosi na uređenje parkinga i ceste između zgrade ST (popularna „sisulja“) i zgrade u kojoj se nalazi pekara „Sarajka“, a iznad Optike „Kobi i Nuri“. Iako male površine, navedeni dio ceste i parkinga u samom centru grada je u katastrofalnom stanju. Predložio je da se lokacija obiđe i utvrdi stanje, te da se sanacija uvrsti u neki od programa utroška sredstava Zavoda.

Armin Bašić: je pokrenuo dvije vijećničke inicijative. Prva inicijativa je za hitno iznalaženje strategije i uspostavu sistema za odvoz i prikupljanje kabastog otpada i luga, a najkasnije do 01.10.2024. godine. Krajnje je vrijeme da JP „Vodokom“ kao jedino preduzeće koje se bavi prikupljanjem otpada unaprijedi standarde rada i kvalitet usluga tj. da upotpuni svoju djelatnost. Osnovni razlog za pokretanje inicijative je problem nekontrolisanog odlaganja kabastog otpada u rijeke, potoke, šume, poljoprivredne površine i dr., što predstavlja ogromna onečišćenja i zagađenja u prigradskim naseljima. Druga inicijativa je za rješavanje problema vodosnadbijevanja u naselju Gornji Lučani. Naime, Gornji Lučani su jedno od rijetkih naseljenih mjesta koje tokom većeg dijela godine nema pitke vode, što smatra nedopustivim u 21. stoljeću.

Mirsad Tursum: je pokrenuo dvije vijećničke inicijative. Prva se odnosi na priključak ambulante Krševac na lokalni vodovod Varalići. Ističe da je JU „Dom zdravlja sa stacionarom“ spremna finansijski učestvovati u realizaciji priključka da bi ambulanta Krševac mogla dobiti dozvolu za rad. Druga inicijativa se odnosi na regulaciju prilaska Domu zdravlja i vrtiću „Pčelica“. Naime, ulazak u krug Doma zdravlja je veoma usporen, a veoma često i onemogućen zbog vozila koja nemaju izlaz ispred vrtića, te svojim kretanjem onemogućavaju ulazak u krug Doma zdravlja.

Općinski načelnik (odgovor): je rekao da je potpisan ugovor sa izvođačem da se dovede vodovod Varalići do ambulante Krševac i da će radovi vrlo brzo krenuti, čim vremenske prilike budu dozvoljavale.

Adnan Čobo: je pokrenuo dvije vijećničke inicijative. Prva inicijativa je da se Ski-staza na izletištu Ponijeri nazove, odnosno da joj se dodjeli ime „Staza Muje Kulovića“. Mujo Kulović cijeli svoj životni vijek je posvetio sportu, a bio je prije svega veliki zaljubljenik Ponijera i jedan je od pionira organizovanog skijanja na Ponijerima. Druga je da se u okviru manifestacije „Izbor sportiste godine“ oformi nova nagrada i da se dodjeljuje za entuzijazam u sportu i poseban doprinos razvoju amaterskog i sporta na području općine Kakanj, a da nagrada/priznanje nosi naziv „Slatki poeni – nastavnik Mijo Mijačević“. Nastavnik Mijo Mijačević je dugogodišnji sportski radnik koji je u sportu primjenjivao karakteristične metode - formiranje generacije tj. škole sporta koju je formirao u najnižim razredima, te kao takve vodio do kraja školovanja, formirajući tako uvijek jednu sjajnu generaciju sportista bilo u muškom ili ženskom sportu. Uz to je bio organizator poznatih nadmetanja i turnira pod nazivom „Slatki poeni“.

Safet Šahman: je pokrenuo vijećničku inicijativu za postavljanje znaka skretanja u naseljeno mjesto Turalići kod mosta Stari dom na raskrsnici Starposli – Brnjic – Podborje. Uz to se osvrnuo na inicijativu vijećnika Tursuma oko priključka ambulante Krševac na vodovod Varalići i rekao da ne prihvata da je odgovornost isključivo na mjesnoj zajednici Krševac, jer kad je rađen projekat nije se planirao priključak za ambulantu, te je sada neophodno položiti dodatnih 50-60 metara cijevi do ambulante, a radi se o stjenovitom i veoma složenom terenu zašto su potrebna značajnija sredstva koja Mjesna zajednica ne može obezbijediti. Još je rekao da mu nije jasno zašto se insistira da se ambulanta priključi na vodovod koji je tehnički ispravan, odnosno zašto nije moguće ambulantu priključiti na neki drugi postojeći vodovod ako se zna da preko 90% mjesnih vodovoda na području općine Kakanj nije tehnički ispravno, a stanovništvo tu vodu pije i koristi u svakodnevnom životu.

Mirsad Tursum (odgovor): je rekao da nema ništa protiv da se ambulanta Krševac priključi na bilo koji vodovod, ali je problem što se ne može dobiti upotrebna dozvola za objekat dok priključena voda ne bude tehnički ispravna. Rekao je da je Dom zdravlja spreman snositi troškove priključka ambulante na tehnički ispravan vodovod kako se ne bi stekao dojam da je Dom zdravlja protiv rada ambulante Krševac.

Predsjedavajući je konstatovao da su vijećnici: Vinka Aletović, Amar Selimović i Namir Talić podnijeli inicijativu bez korištenja govornice.

Vinka Aletović: je pokrenula vijećničku inicijativu za izgradnju kanalizacione mreže na području naselja Rošćevina. Mještani naselja Rošćevina već dugi niz godina traže umrežavanje kanalizacije na relaciji od osnovne škole u Rošćevini pa do naselja Popare. Kanalizacija je odmaknuta od kuća svega nekoliko metara i mještanima predstavlja veliki problem i opravdani strah za zdravlje stanovništva, posebno djece.

Amar Selimović: je pokrenuo dvije vijećničke inicijative. Prva inicijativa je za izmjenu Odluke o komunalnim djelatnostima zajedničke komunalne potrošnjem, na način da član 7. stav (5) glasi: „Obveznici čija mjesečna primanja ne prelaze iznos 600 KM“. Druga je da se iznađe način za oslobađanje plaćanja urološkog pregleda za osobe koje se vode na evidenciji Biroa za zapošljavanje Kakanj.

Namir Talić: je pokrenuo vijećničku inicijativu da se na glavnoj gradskoj ulici otvori mini biblioteka koja bi bila otvorenog tipa. Mini biblioteke već postoji u većim gradovima. Otvorenog je tipa i imala bi za cilj približiti knjigu našim sugrađanima koji bi mogli podizati knjige i također donirati knjige u tu biblioteku.

Utvrđivanje dnevnog reda

Predsjedavajući je za 39. redovnu sjednicu predložio dnevni red koji je usaglašen na sjednici Kolegija, uz napomenu da je pristigao još jedan materijal „Davanje saglasnosti na Odluku o visini osnovice za obračun plaća radnika JU Centar za socijalni rad Kakanj“, te je predložio da se isti razmatra kao 8. tačka dnevnog reda.

U diskusiji po dnevnom redu su učestvovali: Dževdet Huskić i Vinka Aletović.

Dževdet Huskić: je predložio da se u dnevni red uvrsti tačka „Davanje saglasnosti na Program rada JU „Gradska biblioteka“ Kakanj sa Finansijski planom za 2024. godinu“, uz napomenu da je predmetni materijal razmatran na prethodnoj sjednici Vijeća i da nije dobio potrebnu većinu.

Vinka Aletović: je predložila da se u dnevni red uvrsti tačka „Prijedlog odluke o potvrđivanju rezultata izbora i dodjeli mandata za članove Savjeta mjesne zajednice Željeznička Stanica“, napominjući da je rasprava po toj tački dnevnog reda obavljena na 29. sjednici Vijeća, kao i da je usvojen Izvještaj Komisije o provedenim izborima za članove Savjeta mjesne zajednice Željeznička Stanica, ali odluka nije dobila potrebnu većinu.

Predsjedavajući je dao na glasanje prijedlog vijećnika Huskića, a isti nije dobio potrebnu većinu sa 12 glasova ZA, 1 glas PROTIV i 13 glasova UZDRŽAN, nakon čega je Vijeće glasalo o prijedlogu vijećnice Aletović, te ni taj prijedlog nije dobio potrebnu većinu sa 13 glasova ZA, bez glasova PROTIV i 13 glasova UZDRŽAN.

Vijećnik Adnan Čobo je zatražio poslovničku intervenciju.

Adnan Čobo: je u vezi prijedloga vijećnice Aletović da se u dnevni red uvrsti tačka „Prijedlog odluke o potvrđivanju rezultata izbora i dodjeli mandata za članove Savjeta mjesne zajednice Željeznička Stanica rekao da smatra da Vijeće nije nadležno da odlučuje da li će se provesti rezultati izbora. Smatra da je to pitanje CIK-a i da vijećnica Aletović treba uputiti primjedbu CIK-u zbog neprovođenja rezultat izbora.

Predsjedavajući: je rekao da vijećnik Čobo nije rekao koja poslovnička odredba je prekršena, jer se Vijeće izjašnjavalo da li će neka tačka biti uvrštena u dnevni red, što je propisano Poslovnikom o radu Općinskog vijeća, bez da se prejudiciralo kakvi će biti rezultati glasanja po toj tački ukoliko se uvrsti u dnevni red.

Nakon toga je Vijeće glasalo o predloženom dnevnom redu od strane predsjedavajućeg i isti je usvojen sa 22 glasa ZA, 5 glasova PROTIV, bez glasova UZDRŽAN.

Usvojeni dnevni red

1. Nacrt odluke o zaštiti izvorišta „Devetaci“ Tršće - općina Kakanj sa Elaboratom sanitarno zaštitne zone za izvorište „Devetaci“
2. Prijedlog odluke o dodjeli Petnaestoaprilskih priznanja općine Kakanj
3. Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ pogona „Vrtlište“, lokalitet Stupe
4. Izvještaj o ostvarivanju politike jedinice lokalne samouprave i aktivnostima Općinskog načelnika za 2023. godinu
5. Izvještaj o radu Općinskog pravobranilaštva za period 01.01-31.12.2023. godine
6. Izvještaj o radu JU „Kulturno-sportski centar“ Kakanj sa finansijskim izvještajem za 2023. godinu
7. Program rada JU „Kulturno-sportski centar“ Kakanj sa finansijskim planom za 2024. godinu
8. Davanje saglasnosti na Odluku o visini osnovice za obračun plaća radnika JU Centar za socijalni rad Kakanj
9. Informacija o stanju sporta na području općine Kakanj za 2023. godinu
10. Informacija JP „Vodokom“ d.o.o. Kakanj o poduzetim aktivnostima u vezi otvaranja Rudnika olova, cinka, barita i pratećih mineralnih komponenti na lokalitetu Rupice-Juraševac-Brestić Adriatic Metals-a u općini Vareš

1. Nacrt odluke o zaštiti izvorišta „Devetaci“ Tršće - općina Kakanj sa Elaboratom sanitarno zaštitne zone za izvorište „Devetaci“

Predlagač: Općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji nije niko učestvovao i Vijeće je jednoglasno sa 25 glasova ZA utvrdilo Nacrt odluke o zaštiti izvorišta „Devetaci“ Tršće - općina Kakanj sa Elaboratom sanitarno zaštitne zone za izvorište „Devetaci“, uz Zaključak o provođenju javne rasprave u trajanju od 30 dana, u periodu 01.04-30.04.2024. godine.

2. Prijedlog odluke o dodjeli Petnaestoaprilskih priznanja općine Kakanj

Predlagač: Komisija za dodjelu Petnaestoaprilskih priznanja

Obrađivač: Stručna služba za poslove Općinskog vijeća

Izjavitelj: Ajla Čišija, predsjednica Komisije za dodjelu Petnaestoaprilskih priznanja

Ajla Čišija: je ispred Komisije za dodjelu Petnaestoaprilskih priznanja predložila dobitnike i to: Grb Općine Kakanj – NTV IC Kakanj, Plaketa sa diplomom – Munevera Zečević i Mijo Šain, Zahvalnica – Vehid Kubura, Emerin Ahmetašević i Milenko Srdić.

U diskusiji nije niko učestvovao i Vijeće je usvojilo Odluku o dodjeli Petnaestoaprilskih priznanja općine Kakanj sa 18 glasova ZA, bez glasova PROTIV i 9 glasova UZDRŽAN.

3. Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ pogona „Vrtlište“, lokalitet Stupe

Predlagač: Općinski načelnik

Obrađivač: Službe za imovinskopravne, geodetske poslove i katastar nekretnina

Izjavitelj: Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 26 glasova ZA usvojilo Odluku o utvrđivanju javnog interesa u svrhu proširenja rudarskih radova u „Istočnom reviru“ pogona „Vrtlište“, lokalitet Stupe.

4. Izvještaj o ostvarivanju politike jedinice lokalne samouprave i aktivnostima Općinskog načelnika za 2023. godinu

Predlagač: Općinski načelnik

Obrađivač: Stručna služba za poslove općinskog načelnika

Izjavitelj: Mirnes Bajtarević, općinski načelnik

U diskusiji su učestvovali: Dževdet Huskić, Slaven Katičić, Mediha Mamela i Mujo Fafulić.

Dževdet Huskić: se složio sa dijelom Izvještaja koji govori o radu i susretljivosti općinskih uposlenika i rekao da su neke stvari u Izvještaju detaljno obrazložene, dok su neke dosta uopštene i da se upravo sa tim on ne slaže ili su mu nedorečene. U tom smislu je rekao da se spominju održani sastanci sa nekoliko kakanjskih privrednika, kao i sa onima koji nisu iz Kakanja a imaju namjeru širiti biznis u Kakanju, bez da se navodi koji su to privrednici i šta je planirano od strane istih. Smatra da nije za pohvalu ostvareni suficit, jer se budžetska sredstva trebaju iskoristiti za planirane namjene. Istako je spornim što Zavod za planiranje i izgradnju nije u sistemu trezorskog poslovanja, a u Izvještaju se hvali kako smo jedna od rijetkih Općina koja vrši trezorsko poslovanje, iako je jedna od preporuka revizorskog izvještaja bila da se Zavod uvede u sistem trezorskog poslovanja. Spominje se saradnja sa dijasporom i projekat „Diaspora Invest“ dok je veliki broj korisnika blokiran na zvaničnoj FB stranici Općine. Spominje se delegiranje Kraljeve Sutjeske za jedno od najljepših sela u BiH, a da se istovremeno ništa ne ulaže u turistički potencijal Kraljeve Sutjeske. Cijeni apsurdnim što se u Izvještaju navodi kako smo u Briselu prepoznati kako možemo iznijeti video uradak o našim mogućnostima, planovima i slabostima, dok je za odnos sa građanima na društvenim mrežama rekao da se nalazi na bijednom nivou, a u Izvještaju se govori o ostvarenoj dvosmjernoj komunikaciji. Rekao je da ne vidi prednosti Općine Kakanj u kontekstu

navoda da se nalazimo na 7. mjestu najperspektivnijih lokalnih zajednica za ulaganje i širenje poslovanje. Još je rekao da zamjera načelniku i Uredu načelnika što je u više navrata omalovažavan rad prethodne Vlada ZDK, kao i posjeta bivše dopredsjedavajuće Skupštine ZDK koja se stavila na raspolaganje Općini za sve potrebe dok je obavljala tu funkciju. Također je rekao da je minimizirano obezbjeđenje od iste 300 hiljada KM za rekonstrukciju JU „Gradska biblioteka“ i da se sve čini da se ta sredstva istope. Na kraju je spomenuo navode o održanim sastancima po pitanju zaštite vode za piće, gdje se navodi da su sastanci održani sa predstavnicima Adriatic Metals, nevladinim organizacijama i eko udruženjima radi zajedničkog nastupa po toj problematici, ali se ne navodi o kojim nevladinim organizacijama i eko udruženjima se radi, šta je poduzeto, te koji su rezultati postignuti i protiv koga su podnesene krivične prijave.

Slaven Katičić: je rekao da podržava rad općinskog načelnika i da mu treba dati podršku u daljem radu. Osvrnuo se na navode vijećnika Huskića oko izostanka ulaganja u Kraljevu Sutjesku i rekao da mu je kao nekome ko tamo živi dobro poznato šta je urađeno u proteklom periodu. U tom smislu je napomenuo da je urađena sanacija korita rijeke Trstionice (uloženo preko 100 hiljada KM) i da imaju rezervisana sredstva za dodatne radove na tom projektu (oko 50 hiljada KM), zatim je urađena rekonstrukcija javne rasvjete i postavljena nova LED rasvjeta, urađen je novi most preko rijeke Trstionice, te je rekonstruisan glavni trg i prostorije društvenog doma, ugrađeni su podzemni kontejneri, a u toku su aktivnosti oko projekta sanacije vodovoda. S toga smatra da nije uredu da se kaže da ništa nije urađeno, te je dodao da su ranije značajna sredstva uložena u sanaciju Franjevačkog samostana, kao i u postavljanje rasvete oko istog.

Mediha Mamela: je kazala da je iz Izvještaja vidljiva jasna vizija upravljanja lokalnom zajednicom, te su detaljno navedeni ostvareni rezultati i planirani ciljevi. Rekla je da će Izvještaj podržati jer se vidi da se radilo i dosta zadatih ciljeva ostvarilo.

Mujo Fafulić: je pohvalio izvještaj i rad načelnika i općinske administracije. Rekao je da je imao priliku slušati izvještaje načelnika iz drugih općina u BiH koji nisu ni približno sadržajni ni kvalitetni kao predmetni. Raduje ga činjenica da se značajna sredstva ulažu u razvoj općine Kakanj i svjestan je činjenice da se uvijek može više i bolje, ali smatra da Izvještaj zaslužuje da bude podržan.

Općinski načelnik: se osvnuo na neke navode iz diskusije i rekao da se slaže sa konstatacijom da nedostaje turističke ponude u Kraljevoj Sutjeski, te je podsjetio da lokalna zajednica kroz razne poticaje stvara uslove kako bi se neko odlučio da pokrene neki biznis i da je to jedini trenutni način da se djeluje do formiranja JU za razvoj turizma. U vezi obezbijeđenih sredstava za rekonstrukciju Gradske biblioteke je rekao da su sredstva obezbijeđena a da prethodno nije pripremljena dokumentacija za izvođenje radova, zbog čega se izgubila godina dana za pripremu iste. Također je rekao da je greška što su sredstva prebačena na račun JU, a ne Zavoda koji je specijalizovan za realizaciju takvih transfera, dok JU nema iskustava te vrste, pa čak nije ni registrirana na portalu javnih nabavki, što je sve usložnilo proces i dovelo do situacije da se dugo čeka na realizaciju projekta. Što se tiče zamjerke da nisu navedeni privrednici sa kojima se razgovaralo oko investicionih ulaganja je rekao da to nije urađeno iz razloga što su isti insistirali da se u javnost ne izlazi sa bilo kakvim informacijama i planovima dok oni zvanično donesu odluku da investiraju i u tom smislu je rekao da je zvanično da se u Bilješevu pokreće otvaranje savremene otkupne stanice za otkup poljoprivrednih proizvoda. Još se osvrnuo na navode oko posjete Briselu pri čemu je rekao da su te informacije trebale na određeni način izazvati provokaciju kod svih i da se uključe svi oni čije stranke participiraju u vlasti na federalno i državnom nivou da se prepozna značaj lokalne zajednice u složenim procesima koji predstoje (dekarbonizacija i pravedna tranzicija).

Nakon diskusije Vijeće je usvojilo Zaključak o prihvatanju Izvještaja o ostvarivanju politike jedinice lokalne samouprave i aktivnostima Općinskog načelnika za 2023. godinu sa 22 glasa ZA, bez glasova PROTIV i 6 glasova UZDRŽAN.

5. Izvještaj o radu Općinskog pravobranilaštva za period 01.01-31.12.2023. godine

Predlagač: Općinsko pravobranilaštvo

Obradivač: Općinsko pravobranilaštvo

Izjestilac: Vesna Ajanović, općinski pravobranilac

U diskusiji nije niko učestvovao i Vijeće je jednoglasno sa 28 glasova ZA usvojilo Zaključak o prihvatanju Izvještaja o radu Općinskog pravobranilaštva za period 01.01-31.12.2023. godine.

6. Izvještaj o radu JU „Kulturno-sportski centar“ Kakanj sa finansijskim izvještajem za 2023. godinu

Predlagač: UO JU „Kulturno-sportski centar“ Kakanj

Obradivač: UO JU „Kulturno-sportski centar“ Kakanj

Izjestilac: Dženan Ajdinović, direktor JU i Nihad Tukić, predsjednik UO JU

U diskusiji nije niko učestvovao i Vijeće je usvojilo Zaključak o prihvatanju Izvještaja o radu JU „Kulturno-sportski centar“ Kakanj sa finansijskim izvještajem za 2023. godinu, sa 17 glasova ZA, bez glasova PROTIV i 9 glasova UZDRŽAN.

7. Program rada JU „Kulturno-sportski centar“ Kakanj sa finansijskim planom za 2024. godinu

Predlagač: UO JU „Kulturno-sportski centar“ Kakanj

Obradivač: UO JU „Kulturno-sportski centar“ Kakanj

Izjestilac: Dženan Ajdinović, direktor JU i Nihad Tukić, predsjednik UO JU

U diskusiji je učestvovao Dževdet Huskić.

Dževdet Huskić: je podržao novoimenovanog direktora JU i u tom smislu rekao da će podržati predloženi Program rada, te je izrazio nadu da će ubuduće JU biti za sve, a ne samo za određene strukture. Pitao je da li je planirano da se ozbiljnije uradi ski-staze na Ponijerima, jer dosta korisnika imaju zamjerku na ozbiljnu količinu kamenja koji se nalazi na stazi, te je pitao imali se u planu ulaganje sredstava u dječiji ski-lift.

Nakon diskusije Vijeće je jednoglasno 26 glasova ZA usvojilo Zaključak o davanju saglasnosti na Program rada JU „Kulturno-sportski centar“ Kakanj sa finansijskim planom za 2024. godinu.

Uslijedila je pauza u radu Vijeća do 13,00 h.

8. Davanje saglasnosti na Odluku o visini osnovice za obračun plaća radnika JU Centar za socijalni rad Kakanj

Predlagač: UO JU „Centar za socijalni rad“ Kakanj

Obradivač: UO JU „Centar za socijalni rad“ Kakanj

Izjestilac: Fakir Ajdinović, direktor JU i Emina Šarić, član UO JU

Džihad Berbić: je rekao da se predloženo povećanje osnovice može uklopiti u plan koji postoji u Budžetu Općine.

U diskusiji nije niko učestvovao i Vijeće je jednoglasno sa 20 glasova ZA usvojilo Zaključak o davanju saglasnosti na Odluku o visini osnovice za obračun plaća radnika JU Centar za socijalni rad Kakanj.

9. Informacija o stanju sporta na području općine Kakanj za 2023. godinu

Predlagač: Općinski načelnik

Obradivač: Služba za društvene djelatnosti, boračka pitanja, raseljena lica, izbjeglice i povratnike

Izjestilac: Edin Aliefendić, pomoćnik općinskog načelnika

U diskusiji nije niko učestvovao i Vijeće je usvojilo Zaključak o primanju k znanju Informacije o stanju sporta na području općine Kakanj za 2023. godinu, sa 19 glasova ZA, bez glasova PROTIV i 3 glasa UZDRŽAN.

10. Informacija JP „Vodokom“ d.o.o. Kakanj o poduzetim aktivnostima u vezi otvaranja Rudnika olova, cinka, barita i pratećih mineralnih komponenti na lokalitetu Rupice-Juraševac-Brestić Adriatic Metals-a u općini Vareš

Predlagač: JP „Vodokom“ d.o.o. Kakanj

Obrađivač: JP „Vodokom“ d.o.o. Kakanj

Izjavitelj: Haris Veispahić, direktor JP „Vodokom“ d.o.o. Kakanj

U diskusiji su učestvovali: Dževdet Huskić, Slaven Katičić i Mediha Mamela.

Dževdet Huskić: je rekao da je Informacija detaljno i pregledno sačinjena i odlično predstavljena od strane direktora Vodokoma. Osvrnuo se na iznesenu zamjerku direktora što Klub NS nije podržao Zaključak Vijeća o analizi vode i rekao da isti nije podržan iz razloga što je u zaključku stajalo da se obavezuje Adriatic Metals da vrši redovnu analizu vode. Smatra da nije logično da oni vrše analizu vode i rezultate dostavljaju nama, dok je direktor rekao da je ugovor potpisan sa nezavisnom kućom, što bi svakako podržali da je bilo propisano Zaključkom. Podsjetio je da su tek nakon njihovog drugog pitanja šta se događa u gornjem dijelu toka Trstionice iz jula 2022. godine, dobili odgovor od Odsjeka za inspekcije, da ne znaju ništa o tome, dok je istovremeno Vodokom provodio mjere i uskratio davanje saglasnosti i o tome informisao Općinu. Nakon toga je pitao koliko odgovora je Vodokom dobio od nadležnih inspekcijskih organa da su proveli tražene inspekcijske kontrole, te da li je i ako nije zašto nije podnijeta krivična prijava protiv nadležnih kantonalnih i federalnih inspektora zbog izostanka odgovora o izvršenim kontrolama. Pitao je zašto se od 2018-2022. godine nije izašlo u javnost sa raspoloživim informacijama kako bi se izvršio dodatni pritisak na odgovorne, te zašto se protiv nadležnih općinskih službi i načelnika Općine Vareš nisu poduzele zakonske aktivnosti jer je nesporno da su izdali saglasnost i odobrenje za izvođenje građevinskih radova u II i III vodozaštitnoj zoni izvorišta Bukovica, a iste mjere je trebalo poduzeti i protiv ŠPD Zavidovići – Poslovna jedinica Vareš kad je utvrđeno da su izvršili golu sjeću u II vodozaštitnoj zoni izvorišta Bukovica. Na kraju je pitao zašto je Općina Kakanj samo deklarativno podržala napore Vodokoma i zašto se nisu poduzele aktivnosti oko podnošenja krivičnih prijavi i tužbi protiv svih nadležnih koji su u periodu 2018-2021. godine izdali saglasnosti i dozvole za izvođenje radova zanemarujući sve aktivnosti Vodokoma i Stručni nalaz prof.dr. Bašagića.

Slaven Katičić: je rekao da se zalagao da se predmetni materijal nađe na sjednici Vijeća i da je Vodokom vrlo jasno u Informaciji prezentirao tok dešavanja. Također se iz Informacije jasno može zaključiti stav viših nivoa vlasti po ovom pitanju, te smatra da je veliki problem u cijeloj situaciji što se gotovo sve dešava van teritorije Kaknja, odnosno na rubnim dijelovima općine Kakanj, dok se negativne posljedice uglavnom odražavaju na Kaknj. Podsjetio je da su svi vijećnici bili pozvani u obilazak terena rudnika, ali ih se malo odazvalo i kojom prilikom se moglo zaključiti da situacija nije dobra i u kom pravcu sve ide. Smatra da su neke stvari olako zanemarene, ali da u ovom trenutku treba podvući crtu i biti jedinstven u daljnjim aktivnostima. Ocijenio je dobrim što je Vijeće tražilo da se vrše analize nultog stanja da bi se mogla pratiti dešavanja nakon izvođenja radova. Rekao je da se na sastanku sa predstavnicima Adriatic Metalsa jasno moglo zaključiti ko stoji iza koga projekta, te da su isti potencirali da je projekat od vitalnog interesa za BiH, istovremeno zanemarujući značaj stanovništva sa ovog područja. Na sastancima se predlagalo da se sa Adriatic Metals zaključi sporazum kojim će oni garantovati ispravnost vode izvorišta Bukovica, ali su to oni odbili. Mišljenja je da se u ovom trenutku moraju imati jasni mehanizmi zaštite, te je ocijenio pozitivnim što je Adriatic Metals iskazao spremnost za nabavku i postavljanje uređaja za vršenje kontrole. Nužnim smatra imati jedinstven stav prema Adriatic Metals, nadležnim inspekcijama i svim nivoima vlasti bez obzira na političku pripadnost. Pozvao je na pružanje podrške Vodokomu za dosadašnje i buduće aktivnosti, uz nastojanje da se izradi strateški sporazum između Adriatic Metals, Vodokoma i Općine Kakanj.

Mediha Mamela: se zahvalila Vodokomu na kvalitetnoj Informaciji i preložila pauzu radi usaglašavanja zaključaka po istoj.

Haris Veispahić (odgovor): se zahvalio na korektnoj diskusiji i pozvao sve vijećnike da problem sa vodom i vodosnabdijevanjem ne posmatraju sa političke strane, odnosno da ga tretiraju odvojeno od svih drugih poslova i aktivnosti koje Vodokom obavlja. Smatra da nema nevinih u predmetnoj situaciji, bez obzira na političku pripadnost i da Vodokom treba da nastavi aktivnosti u istom pravcu, bez obzira ko je u vlasti i na kojem nivou. Nejasno mu je što Klub NS nije podržao Zaključke kada je Vijeće raspravljalo o

zaštiti i osiguranju vodosnabdjevanja stanovnika općine Kakanj pitkom vodom. Rekao je se Vodokom obraćao inspekcijama kad god bi ocijenili da je za to bilo potrebe, očekujući da će oni poduzeti sve što je potrebno i što im zakoni nalažu, ali su očito viši interesi nadjačali interese Vodokoma i stanovnika općine Kakanj. Za pismo namjere Adriatic Metalsa je rekao da je pokazatelj njihove spremnosti na saradnju zbog čega je u tom cilju održano nekoliko sastanaka sa istima, kojom prilikom je zahtijevano da nabave uređaj za mjerenje prisustva teških metala u realnom vremenu (stacionarni i mobilni), za što su oni iskazali spremnost. Na kraju je zamolio sve vijećnike da ne šire dezinformacije i da ne podliježu istima kada se govori o kvalitetu vode koju distribuira Vodokom, kako ne bi odmagali Vodokomu, obzirom da isti u svom radu i svim aktivnostima koje poduzima štiti interes kapitala općine Kakanj. Uz to je naglasio da je voda koju Vodokom distribuira, na današnji dan, mikrobiološki, fizičko-hemijski, te po zadnjem nalazu i na prisustvo metala, u potpunosti ispravna za piće i upotrebu.

Usljedila je pauza u radu Vijeća radi usaglašavanja zaključaka.

Dževdet Huskić (replika): je kazao da u Zapisniku sa 18. sjednice Općinskog vijeća piše: „Traži se od društva „Eastern Mining“ d.o.o. Vareš da vrši mjesečne analize vode Borovičkog potoka na teške metale u skladu sa Pravilnikom o zdravstvenoj ispravnosti vode za piće, te rezultate analiza dostavlja operateru javnog vodosnabdjevanja na području općine Kakanj JP „Vodokom“ d.o.o. Kakanj“, pa iz tog razloga Klub NS nije podržao predmetni Zaključak, jer smatra nelogičnim da analize radi onaj za koga se sumnja da je zagađivač.

Haris Veispahić: je pojasnio da vijećnik Huskić sporni Zaključak nije pročitao do kraja, jer je u nastavku citiranog dijela Zaključka navedeno: „Uzorkovanje i analizu trebaju vršiti ovlaštena i akreditovana društva za obavljanje ovih vrsta poslova (od strane Instituta za akreditiranje BiH – BATA), a sve u cilju ispravnog praćenja kvalitativnog i kvantitativnog stanja pritoka rijeke Bukovice“, te smatra da je sve jasno navedeno i da nije bilo razloga da se isti ne podrži. Nakon toga je prezentirao Vijeću usaglašene zaključke koji glase:

„U cilju zaštite i osiguranja kontinuiranog javnog vodosnabdjevanja stanovnika općine Kakanj pitkom vodom iz javnog vodovodnog sistema, a što je u općem javnom interesu svih građana, Općinsko vijeće utvrđuje sljedeće:

1. Općinsko vijeće prima k znanju Informaciju JP „Vodokom“ d.o.o. Kakanj o poduzetim aktivnostima u vezi otvaranja Rudnika olova, cinka, barita i pratećih mineralnih komponenti na lokalitetu Rupice-Juraševac-Brestić Adriatic Metals-a u općini Vareš.
2. Podržavaju se dosadašnje aktivnosti JP „Vodokom“ d.o.o. Kakanj na zaštiti vodozahvata Bukovica i vodozaštitnih zona jer je to od općeg javnog interesa.
3. Traži se od JP „Vodokom“ d.o.o. Kakanj da putem ovlaštene laboratorije (ovlaštene od strane Instituta za akreditiranje Bata) nastavi vršiti mjesečnu analizu vode na prisustvo teških metala i to iz slavina potrošača neposredno poslije fabrike za preradu vode Bukovica, a sve u skladu sa Pravilnikom o zdravstvenoj ispravnosti vode za piće („Službeni glasnik BiH“, broj: 40/10, 43/10, 30/12 i 62/17).
4. Traži se od Adriatic Metals d.o.o., Društvo za istraživanje i eksploataciju rude, Tisovci, Vareš, da putem ovlaštene laboratorije (ovlaštene od strane Instituta za akreditiranje Bata) nastave vršiti mjesečnu analizu vode na prisustvo teških metala i to Borovičkog potoka i rijeke Bukovice, a sve u skladu sa Pravilnikom o zdravstvenoj ispravnosti vode za piće („Službeni glasnik BiH“, broj: 40/10, 43/10, 30/12 i 62/17), Odluke o karakterizaciji površinskih i podzemnih voda, referentnim uslovima i parametrima za ocjenu stanja voda i monitoringu voda („Službene novine FBiH“, broj: 01/14) i Uredbi o opasnim i štetnim materijama u vodama („Službene novine FBiH“, broj: 43/07) i rezultate istih dostavljaju JP „Vodokom“ d.o.o. Kakanj.
5. Traži se od Adriatic Metals d.o.o., Društvo za istraživanje i eksploataciju rude, Tisovci, Vareš, da putem ovlaštene laboratorije (ovlaštene od strane Instituta za akreditiranje Bata) nastave vršiti mjesečnu analizu vode na prisustvo teških metala i to Borovičkog potoka i rijeke Bukovice, a sve u skladu sa Pravilnikom o zdravstvenoj ispravnosti vode za piće („Službeni glasnik BiH“, broj: 40/10, 43/10, 30/12 i 62/17), Odluke o karakterizaciji površinskih i podzemnih voda, referentnim uslovima i parametrima za ocjenu stanja voda i monitoringu voda („Službene novine FBiH“, broj: 01/14) i Uredbi o opasnim i štetnim materijama u vodama („Službene novine FBiH“, broj: 43/07) i rezultate istih dostavljaju JP „Vodokom“ d.o.o. Kakanj.

6. Traži se od društva *Adriatic Metals d.o.o., Društvo za istraživanje i eksploataciju rude, Tisovci, Vareš*, da izvrši nabavku i postavljanje stacionarnog mjernog uređaja za analizu prisustva teških metala u vodi u realnom vremenu u krugu fabrike za preradu vode Bukovica.
Traži se od *Adriatic Metals d.o.o., Društvo za istraživanje i eksploataciju rude, Tisovci, Vareš*, da hitno izvrši nabavku mobilnog mjernog uređaja za analizu prisustva teških metala u vodi u realnom vremenu i isti da na upotrebu operateru javnog vodosnabdijevanja na području općine Kakanj JP „Vodokom“ d.o.o. Kakanj.
Sredstva za nabavku, instaliranje, održavanje i ostale troškove vezane za stacionarni i mobilni mjerni uređaj za analizu prisustva teških metala u vodi u realnom vremenu obezbijedit će *Adriatic Metals d.o.o.*
Nabavka i instaliranje stacionarnog i mobilnog mjernog uređaja za analizu prisustva teških metala u vodi, te upotrebom istih, služit će preventivno kao indikator promjena karakteristika vode.
7. Traži se od JP „Vodokom“ d.o.o. Kakanj da izda svoju saglasnost *Adriatic Metals d.o.o., Društvo za istraživanje i eksploataciju rude, Tisovci, Vareš*, za projekat postavljanja automatske stanice za kontinuirano uzorkovanje i praćenje kvaliteta vode na vodozahvatu Bukovica (za parametre: pH vrijednost, elektroprovodljivost, koncentracija rastvorenog kisika i temperatura) tek kada *Adriatic Metals d.o.o., Društvo za istraživanje i eksploataciju rude, Tisovci, Vareš* ispuni traženo u stavci 6. ovog Zaključka.

Zadužuju se JP „Vodokom“ d.o.o. Kakanj i *Adriatic Metals d.o.o. Vareš* da pripreme Sporazum o saradnji kojim će se definisati međusobna prava i obaveze. Sporazum će se prije potpisivanja dostaviti Općinskom vijeću Kakanj na razmatranje i davanje saglasnosti JP „Vodokom“ d.o.o. Kakanj za potpisivanje“.

Nakon toga Vijeća je jednoglasno sa 21 glasom ZA usvojilo prezentirane Zaključke.

Predsjedavajući je zaključio rad 39. redovne sjednice Općinskog vijeća u 15:20 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
-po ovlaštenju-
Emir Zaimović

**PREDSJEDAVALJUĆI
OPĆINSKOG VIJEĆA**
Slaven Katičić